

SEKOLO SA BOTSİKANA SE LAELA BARUTWANA

MABONI MMATLI

GAMASHASHANE: Seleteng sa Capricorn, kua motseng wa Segwahleng, Ga Mashashane, go na le Sekolo se sengwe seo se tsebega bjalo ka Botsikana. Ka Mošupologo wa di 24 Diphlane (Oktoboro) 2016, sekolo se se ile sa swara moletlo wa go laela barutwana ba marematlou le go ba hlotleletša pele ga ditlathobho tša mafelelo a ngwaga tša marematlou. Moletlo o be o tsenetšwe ke barutwana, barutiši gammogo le badudi ba metse ya kgauswi le sekolo. E be e le letšatši la go tlala lethabo ka ge barutwana ba be ba abelwa disetifikeiti tša go šoma gabotse. Tšona e be e se tša mešomo ya ka sekolong feela. Barutwana ba humane le tša dipapadi tša setšo le go fihla sekolong ka nako ka mehla.

Lesetja Dolma Gwangwa, Thabang Ledwaba, Tebogo Masoga le Malose Bambo ba amogetše disetifikeiti tša go ba barutwana bao ba phagameng ka mphatong wa marematlou wa sekolo se.

“Ge o wele, ga se o wele sa ruri. O a tsoga, wa iphumola marole wa re ‘Agee! Ke nyakile ke wele’. Go wa ke thuto e bohlokwa ya go thibela motho go wa gape. O



Lesetja le Thabang go tšwa Sekolong seo se Phagamego sa Botsikana

šomiša seo o ithutileng sona ka go wa ga gago gore mafelelong e be wena mofenyi,” gwa realo Lwdwaba.

Tebogo Masoga le Malose Bambo ba ile ba amogela gape ditebogo go tšwa go sekolo ka ge ba ile ba

kgethwa ba ba ba sepela le Molaodi wa Sediko go yo emela sekolo sa Botsikana gare ga dikolo tše dingwe go Sedikong sa Maune.

“Ke ikwa ke thabile kudu letšatšing la lehono. Ke kgale ke duma gore sekolo sa gešo le sona se tsebje ka tše dibotse ebile ke a dumela

gore segologolo se be se bolela nnete ge se re ‘K o d u m e l a moepathutse...’. Go itima boroko le go šala sekolong ga rena, go re thušitše. Ke na le tumelo ya gore mo ga se moo re felelang gona. Nnayena ke nyaka go ipona ke tšweletše bophelong. Go

bao ba leng ka morago ga rena, ke re go bona; ‘Tlogatloga e tloga kgale, modiša wa kgomo o tšwa natšo šakeng’. Le se ke la ba le ditlhong tša go kgopela thušo go barutwana ba bangwe ebile le se ke la tšhaba barutiši. Ke bona ba re swaretšeng thušo,” gwa realo Bambo a myemyela.

BOINGWADIŠO BJA BARUTWANA BJA 2017

Kgoro ya Thuto ya Limpopo e kgopela batswadi ka moka bao bana ba bona ba sego ba amogelwa sekolong, go etela Diofisi tša Sediko. Moo ke fao ba tlogo hwetša thušo ya go tšwela pele. Se se swanetše go dirwa pele ga go thongwa ga dithuto ka Pherekong ngwaga wo o tlogo wa 2017. Ditlhotlo tšeo Kgoro e kopanago natšo mo nakong ye di akaretša tše:

- Batswadi ba bangwe ba leka go thetsa / hlohleletša dikolo go amogela bana ba bona le ge ba botšwa gore sekolo se tletše la go falala dikolong tšeo ba di ratago esego dikolo tša fao ba dulago gona.
- Batswadi ba bangwe ba tšwela pele go etela Diofisi tša Didiko go kgetha dikolo le ge dikolo tšeo di tletše bakeng sa go dirišana le Diofisi tša Didiko go ngwadiša bana ba bona dikolong tša kgauswi fao go nago le sekgoba.
- Batswadi ba bangwe ga ba nyake go tšweletša mangwalo a bohlatse a go lokafatša go amogelwa ga bana ba bona. Bakeng sa go dira bjalo, ba tsoša polelo ya gore ba a kgethollwa, ba hloilwe go ya ka maleme ao ba a bolelago, letlhoyo, morafe, tumelo ya bona eupša ba šitwa go tšweletša bohlatse bja tšeo ba di bolelago.
- Ba bangwe ga ba itshwenye ka go ya Diofising tša Didiko go hwetša thušo eupša ba thoma ka go botša setšhaba maaka ka go diriša methopo ya leago. Go fa mohlala, ba ya go dintlo tša methopo ya ditaba, go tloga fao ba tsena go methopo ya ditaba ya leago.

Go thuša setšhaba, batswadi le bahlokamedi ba bana, ba kgopelwa go phetha ditlhotlo tšeo di ka bago di le gona ka boingwadišo bja barutwana bja 2017 le Diofisi tša Didiko. Kgoro ga e dume go bona yo a hlokago sekolo ka 2017.

Naa go direga eng moo o dulago gona. Go na le ditaba?

Leletša Seipone: 015 291 1200